

34.3.A.10
2
INSTITVTA
CONGREGATIONIS

ORATORII S. MARIAE IN
VALLICELLA DE VRBE.

A B. Philippo Nerio Fundatæ.




BEATVS PHILIPPVS NERIVS FLORENTINVS
CONGREG. ORAT. FVND. Obijt Roma E. Kalend Junias Anno 1593. Aetate 83.
Roma L. Laurus f. Cu Privilegio Summi Pont. et Superiorum permissu.
1591.

ROMAE, M. DCXII.
Ex Typographia Reu. Camerae Apostolicae.
Superiorum permissu.

Imprimatur si videbitur R. P. M. Sac. Pal. Apost.
Cesar Fidelis Vicefg.

*Imprimatur F. Thomas Pallavicinus Bonon. Mag.
& Reuerendiss. P. F. Lud. Ystella Soc. Pal.
Apostolici Mag. Soc. Ord. Prædicatorum.*



ROMA. M. DC. XII.
Ex Typographia R. et G. Martini & Jo. Baptistae.
Superiorum beryllia.



RATORII CONGREGATIO
A BEATO PHILIPPO NE-
RIO moribus potius eru-
dita, quàm legibus astricta,
nullam ad Religiosorù ho-
minum consuetudinem pro-
prium sibi regulam habuit,
ad quam consultationes dirigeret rerum ge-
rendarum. Etenim Pater optimus omnium
consilia pro cuiusq; ingenio solitus paterno
moderari affectu, satis habuit ad pietatem si-
mul inflàmatos in ipsa rerum humanarum de-
spicientia CHRISTI amore feruentiores vi-
dere suos, & quę diuturna experientia ad pro-
bitatem assequendam, Deumq; promerendum
eis placere nouerat, & in dies prodesse, tan-
quam à Domini spiritu probare, & confirma-
re. Et hanc viam meritò sæcularibus Presby-
teris ille monstrauit, licet à Religiosorum
institutis distantem, qui Congregationem,
non se auctore, sed Deo Optimo Maximo du-
ce, ac perfectore institutã sæpè dicebat. Ea

igitur, quæ vel ipse hac ratione condenda curauit, vel ab eius institutione inter Congregationis nostræ homines consuetudine recepta, ac deinceps perpetuò seruata vt breuiter cognosci possint, summatim collecta sunt.

De Oratorio, & Oratione.

De Ecclesia, & Diuinis Officijs.

De salutari familiarium sermonum vsu.

De statu Cōgregationis Oratorij perpetuo.

De Præpositi, & quatuor Presb. Deputatorum electione, & munere.

De admittendis in Congregat. & eijciendis.

De Tyronum institutione.

De præcipuis nostrorum obseruationibus.

De vestitu, & consuetudine familiari.

De triclinio, & communi mensa.

De Oratorio, & Oratione.

Cap. I.



Erè locum orationi destinatum Oratorium dicimus. Nam familiaris in ipso nata diuini Verbi tractatio, post hæc tractanda, iam adultâ, & in Ecclesiam nostram trās lata nomen minus accommodatè retinuit.

Ora-

Oratorij, in quo scilicet tam exteri, quam nostri quotidie vesperi post orationem, quam dicimus mentalem, consuetas Litanias recitant, aut singulis ter hebdomadis, quæ est voluntaria corporis castigatio, supplicio flagellorum sese afficiunt. Festis item diebus à Calendis Nouembris, usque ad sanctam Christi Domini Resurrectionem, non modò supplicationibus, sed etiam familiari cohortatione, & musico concetu excitantur ad Cœlestia contemplanda. A Resurrectione vicissim Dominica usque ad Calendas Nouembris, post officium vespertinum in Ecclesia à nostris decantatum, & auditum sermonem in suburbani quempiam locum, vel (si per calores æstiuos non liceat,) in templum aliquod ad has rerum diuinarum tractationes intra Urbem conuenire solent. Singulis præterea diebus Dominicis, nisi nostro sit in templo concionandum, manè lectis Litanis, & sermone opportuno de documentis præsertim Euangelicis familiariter habito, declarantur ex exteris, qui septem primarias Urbis Ecclesias, ac tres domos infirmorum publicas hospitales infra hebdomadam aliquando visitent. Harum omnium cura rerum Præfectum attingit Oratorij, è nostris constitutum Sacerdotibus, vel adiutorem; vt alteruter his ritibus præsit, salutiq; confluentium consulat externorum.

quibus etiam præfenti ope pietatis, officia, in valetudinarijs erga ægrotos festis diebus proponat exercenda. Ex exteris item fratribus idoneos ad certa Oratorij munia deligat, & in primis Rectorem, caueatq; ne vlla ex parte constitutioni derogetur, quam Congregatio his verbis expressam voluit.

Præfectus Oratorij nostri nullo modo permittat exteris Officialibus in eo constitutis, vt in aliquid se rerum, aut negotiorum ingerant, ad ipsum locum, vel institutum quoquo modo pertinentium, quod ipse non eis præscripserit: nullum enim huiusmodi ius, aut potestatem habere possunt. Ne quid præterea innouetur, ibi hætenus obseruatum, de rebus præsertim grauib; ad Oratorium spectantibus quibuscunq; Præpositum Congregationis nostræ consulat, penes quem rerum Oratorij, & Congregationis eadem est gubernatio.

Hæc satis, vt appareat, qua via sint externi frequentiores in Oratorio ad contemplationem, & amorem diuinorum promouendi. Nostris autem eiusmodi instituto magis deditis, id etiam maximè adhibendum, quod à Beato PHILIPPO Patres edocti ad hunc modum constituerunt.

Horas suas quilibet habeat meditationibus præstitutas, in quibus maiores quotidie pro-

progressus faciat, Deum, cælestiaq; amando,
 & appetendo; quod superiores pro sua chari-
 tate, ac prudentia sapius vnumquemq; ad-
 monere, & qui huiusmodi studiorum fructus cõ-
 stet, animaduertere debebunt. Habent igitur,
 quæ orationi, & meditationi seponant stata
 tempora, & præter hortatorem Præpositum,
 quem audiant, etiam Sacerdotem sacris fami-
 liæ nostræ confessionibus audiendis præfectum,
 qui pro sua quemq; prudentia ad hæc diuina
 studia vel segniorem incitare solet, vel ni-
 mis incitato, cum fuerit consentaneum, ,
 moderari.

Cæterum ob alias plurimas occupationes
 sibi, proximisq; salutare, aliud nullum manè,
 vel die orandi tempus, ac spatium sibi præfi-
 nitum capiunt, & consignatum, quam quod
 arbitrato quisq; suo eiusmodi meditationibus,
 & sacris precibus piè, sanctèq; dederit. Ad
 Vesperum autem, sicuti dictum est, in Orato-
 rium publicum externis etiam quibusq; viris
 patens, & expositum ad orationem, vnde no-
 men accepit, seduli conuenire debent. Sed
 de omni orationis, & flagellorum in Orato-
 rio ritu, & consuetudine, deq; pijs externo-
 rum officijs, infra post alias constitutiones, in
 huius capitis appendice agendum est.

De Ecclesia, & Diuinis officijs.

Cap. II.



Congregationis nostræ Sacerdotes, vtpotè diuinorum, & ministri, in Ecclesia, festis præsertim diebus, frequenter adsunt. Alij confluentibus diuina Mysteria præbent, alij ad sacras confessiones audiendas intenti, à prima luce ad horam vsque prandij, è subsellijs suis, non nisi necessitate impulsì recedunt. Sacrum omnes quotidie peragunt, & cæteri inferuiunt, potissimum Clerici, qui cùm res ipsa sacra solènniori ritu, & musico concètu celebranda est, benè manè descendentes in Sacrarium, Sacerdotes pia diligentia sacris vestibus ornant, & solemni sacrificio præsentès, ac diuersa munera obeuntès ab ipsa Sacrorum custodia, aut Ecclesia, dum datur diuinis opera, nunquam recedunt. De rebus autem ad Ecclesiam spectantibus hæc sũt nostris proposita decreta.

In Ecclesia nostra nullæ erunt statuae vitæ functorum, siuè ex marmore, siuè ære, siuè gypso, aut alia materia.

Diebus Festis semper solemni apparatu, tã Missa, quàm Vesperę celebrabuntur. Erunt

etiam

etiam Vesperę solemnes in Vigilijs Corporis CHRISTI, Natiuitatis Beatę MARIAE Virginis, & Consecrationis Ecclesię nostrę ad x. Cal. Iunij, cuius octauę redditur officium, & infra eā gratissima nobis recurrit memoria dormitionis Beati Philippi Patris nostri, ad vij. scilicet Cal. Iunias. Pręterea intra octauam Corporis CHRISTI Vesperas quotidie decantamus.

Singulis similiter annis Iv. Cal. Februarij dies Festus Sanctis PAPIAE, & MAURO Martyribus solemnı apparatu celebratur, & manę eius diei festi res sacra Diacono, & Subdiacono ministris peragitur. Vesperę in Vigilia, & ipso die festo musico concętu decantantur. Porro in Vigilia etiam matutinę laudes antę cęnam, coram sacris eorum Reliquijs a Sacerdotibus, & Clericis nostris vnę recitantur, vt debitus honor patronis Ecclesię, & Congregationis exhibeatur.

In trāslatione verō, quę contingit iij. idus Februarij idem seruatur; Missa tamen, & Vesperę solemniter non decantantur.

Dies etiam festus Sancti Gregorij Papę Congregationis, & Ecclesię nostrę Patroni iv. Idus Martij est nobis, tām in primis Vesperis, quām in Missa admodum sollemnis.

Alios item Sanctos, quorū sacris Reliquijs, vel insignioribus aucti sumus, Ecclesiasticis

officijs singulariter veneramur. Nam IV. nonas Maij NEREVM, ACHILLEVM, & DOMITILLAM Martyres, duplici.

VII. nonas Iulij PATERMVTHIVM, COPRETEM, & ALEXANDRVM Martyres, quibus dicatum est Altare, semiduplici.

VI. Calendas Augusti PANTALBONEM Martyrem, semiduplici.

XI. Calendas Nouembris VRSVLAM, & Socias Virgines, & Martyres, semiduplici.

XIX. Calendas Ian. SPIRIDIONEM Episcopum, & Confessorem, semiduplici similiter prosequimur.

Quamuis verò nostri Ecclesiasticis officijs, Vesperis dierum Festorum exceptis, Ecclesiam non frequentent: cum tamen habetur aliqua singularis celebritas anniuersaria, vt die festo Purificationis Beatæ MARIAE Virginis ad candelas, in capite ieiunij ad Cineres, Dominica Palmarum ad Oliuas, consuetis maioris Hebdomadæ diebus ad matutinas, Missam, aliasq; solemnes eius temporis ceremonias. Die insuper Festo omnium Sanctorum ad Vesperas, præter consuetas, etiam defunctorum, item ad matutinas, sicut manè ad Missam. Nocte tandem Natiuitatis D.N. IESV CHRISTI ad matutinas, & Missam in Chorum Ecclesiæ conuenire solent.

Sed iã ab hisce Ferijs veniamus ad funera.

Cum

Cum enim aliquis è nostra Congregatione è vita decesserit, singuli Sacerdotes tres missas celebrabunt pro vita functo: qui verò Sacerdotes non fuerint, nouem coronas recitabunt; in loco verò, vbi defuncti corpus fuerit præsens, recitabitur officium defunctorum: si manè fuerit, celebrabitur Missa solemnis, sin minus sequenti die Diacono, & Subdiacono ministris, sex candelis accensis in Altari, & quatuor facibus iuxta corpus. Absoluto autem officio duæ ex illis remaneant vsque ad sepulturam. Quod si absens obierit, priuatim recitabitur à Sacerdotibus nocturnum officium Defunctorum: Missa verò solemnis, vt supra. Singulis item annis infra octauam omnium Sanctorum celebrabitur Missa solemnis pro defunctis nostræ Congregationis.

Sine consensu Præpositi, & Deputatorum res sacra non celebrabitur solemni apparatu pro vita functis exteris, videlicet Diacono, & Subdiacono ministris; nec id ipsi faciliè concedent, nisi mortuus Prælatus extiterit, aut eximie dignitatis, & honoris inter Laicos, aut certè valdè benemeritus de nostra Congregatione.

Nullum recipietur à Congregatione nostra legatum de re sacra perpetuò peragenda, nisi fortè iustissima causa intercedat, & ex consensu

senſu Patrum expleti decennij .

Quæ autem hoc in loco de ſacris confeſſionibus videntur ponenda, hæc habemus . Singulis diebus ferialibus aliquis ex Sacerdotibus ad hoc muneris delectis morari debet in Eccleſia ad confeſſiones audiendas : Feria, verò quarta, & ſexta, manè uſque ad horam prandij omnes, & feſtis pariter diebus omnes excubare .

Nemo tamen eorum admittitur ad audiendas confeſſiones ſine Patrum conſenſu, qui exegerint decennium in noſtra Congregatione .

De ſalutari familiarum ſermonum uſu, tam in Eccleſia, quàm in Oratorio .

Cap. III.



N Eccleſia noſtra, die Sabbatho ad vacandum excepto, quatuor quotidie, niſi etiam dies feſti ſint, cum aliquis tantum vnus ſermocinari ſolet è ſacerdotibus noſtris, qui fuerint ad hoc oneris, munerisq; delecti, ordinata ſucceſſione verba, ad vulgi præſertim

cap-

captum accomodantes , & ad nullam prorsus pompam, vel vanum populi applausum declinantes, genere dicendi verè fructuoso, audientium animos pascunt ; Sanctorum præsertim exemplis , ac probatis Historijs sermonem confirmantes. Vitandæ enim sunt eis quæstiones difficiles, dogmatum tractatus, & quæcunq; scholas decent magis, quàm Oratoriū. Est autem eius consuetudinis, qui providè negotium id curet, statò tempore ad Ecclesiam descendere , & inter alia, quæ paranda sunt, horologiū arenariū iuxtà sedem sermocinantiiū ponere, & librum aliquem de salutaribus scriptū præceptis, aut de Sanctorum dictis, & factis, vbi octo, aut decem Auditores præsentēs viderit, lectitare; cum verò quindecim, vel vt summum viginti, ære campano hora, consueta signum dare, quo ille quidem audito, cui primò dicendum est, ad locum festinat, & postquàm legentem paulisper audierit, ligneam sedem sex, vel octo circiter graduum ascensu sublimem conscendit, arenarium horologium iuxtà positum inuertit, quod semihoræ spatium præfiniat, & nullo vsus proæmio, ab argumētò præsertim, quod in libro lectum est, sermonem orditur. In medio eius sermone surgit custos ad signum eadem grādiori campana iterum dādum, quo habitò alter dicturus secundo loco huc properat,

perat, & tantisper expectat, dum primus finem dicendi fecerit. Eodem penitus modo secundo succedit tertius, & tertio quartus. Nec horum cuiquam amplius hora dimidia datur, nec horologio solum, sed tintinnabulo, cum opus est, ad finiendum admonentur.

Sermonibus absolutis sacer concentu musico canitur hymnus, quo expleto is, qui dixit ultimus, ad orationem Dominicam, & Angelicam Salutationem ter secretò recitandam inuitat, & concio dimittitur. At Dominicis, cæterisque diebus festis eorum vnus, quibus ad dicendum sunt eiusmodi dies assignati, in Ecclesia post vespertinum officium decantatum sermonem habet, cui semihoram aliquantulum præterire, non tamen certas iā enarratas dicendi leges, liberū esse debet. Eisdem diebus à Kal. Nouembris, vsq; ad celeberrimum Christi Domini Resurrectionis diem, sicut etiam Dominicis, manè toto anno ab aliquo ex nostris sermo in Oratorio habendus est: Sed hac de re alias; Nunc satis est referre nostras Constitutiones huc pertinentes.

Ad sermonem habendum in Oratorio nullus admittetur ex nostris absq; consensu Patrum, qui decennium expleuerint in Congregatione.

Ex exteris verò nullus inuitandus ad concio-

cionem habendam in Oratorio; vel Ecclesia, nisi ex Præpositi, & quatuor Deputatorum consensu.

De statu Congregationis Oratorii perpetuo. Cap. IV.



Vnc statum, & formam Congregationis nostrę penitus immutabilem in promptu ponimus duobus decretis expressam. Horum primum his verbis sancitum est.

Cum nostra Congregatio solo charitatis mutux nexu, neque vllis astricta votorum, iuramenti, aut promissionis huiusmodi vinculis olim per Beatum Patrem Philippum Nerium, fuerit diuina inspiratione instituta, atq; hæc fuerit eius, & omnium Congregationis Patrum mens semper vnanimis, ac sit, vt ita perseveret, decretum est, si quando aliqui ex nostris putauerint ab hoc statu recedendum, & alligare Patres, fratresq; vllis votorum iurisiurandi, aut promissionis vinculis, etiam si isti maiorem partem conficiant, vt sit ipsis quidem liberum, quam velint ingredi Religionē, sed altera pars quamuis numero longē impar habeat omnia bona

Congregationis quocunq; loco posita, quandiu perseuerauerit in hoc statu, nec alteri quicquam dare, vel acquisitum, vel acquirendum teneatur. Sic enim conseruabitur in Ecclesia Dei circumdata varietate. Haftenus decreti verba; vt indè etiam appareat Parentem optimum in Christo nostrum adduci non potuisse, vt suos alia via filios duceret, qui pro Christiana charitate Religiosos homines, tam religiosè coluit, & pro singulari prudentia sanctissima tot ordinum instituta votorum vinculis religare se volentibus eo tempore ad omnem Christianæ disciplinæ præstantiam fatis esse nouit.

Alterum decretum est. Ne quis prætextu ampliandæ Congregationis, eam dissipet, atq; vt confusio vitetur, quam multitudo parere solet, atq; inter se, qui sunt è Congregatione, amoris vinculo colligentur, quem quotidiana consuetudo conciliat, ac mores cuiuslibet ipsorum ex hoc cognosci possint, & notorum vultus cuncti reuereantur, statutum est, ne Congregatio alibi vllum locum recipiat, neq; alterius Congregationis regendæ suscipiat onus: Si quæ verò aliorum locorum Collegia, & Congregationes nostra instituta obtinuerint, & seruare voluerint, non sint illa quidem nostræ annexa, neq; Clerici eorum sint è Congregatione Oratorij

Romani. Quemadmodum esse debet instituti, ut vnaquæq; Domus, aut familia nostræ formam imitata separatim ab alijs se per se regat, & moderetur.

De Præpositi, & quatuor Presbyterorum deputandorum electione, & munere.

Cap. V.



AD Congregationis, rerumq; ad ipsam spectantium gubernationem, & curam Præpositus primùm eligitur, quem etiam Patrem appellamus; deinde quatuor Presbyteri deputantur. De quorum omnium electione, & munere sic decernit Congregatio.

Nullus Præpositus eligetur, qui in nostra Congregatione quindecim annos non permanferit, quo temporis spatio Deputati, vel ministri sit functus officio, & qui ætatis suæ annum quadragesimum saltem non attigerit.

Electio Præpositi pertinebit ad omnes Sacerdotes Congregationis, qui ex æto decennio fuerint admissi ad ius suffragij ferendi: Laici verò certò sciant, se nihil ad electio-

nem Præpositi, Deputatorum, Præfectorumq;
iuris habere, munia assignata ex præscripto
dumtaxat obituri.

Tàm Præpositus, quàm Deputati, & cæte-
ri Officiales eligi possunt etiam absentes.

Præesse debet in electione, absentiaq; Præ-
positi, quasi Superior, qui primum è Sacer-
dotibus nostris tenet post Præpositum in Con-
gregatione locum.

Fiet autem Præpositi electio hoc modo.
Qui erit à secretis singulis electoribus sche-
dulas dabit, in quibus scriptum, vel typis im-
pressum sit, nomen eligendorum, ut illas in-
vas conijciant, videntibus duobus ad id mu-
neris deputandis. Eductus autem iisdem duo-
bus cernentibus à Secretario clara voce lege-
tur, & electus is erit Præpositus, in cuius ele-
ctionem conuenerint Electores medietate
plures. Hunc sanè modum eligendi, donec
consentiant, decies repetere possunt: post
decimum verò scrutinium, si nec dum in vnū
pars maior media conspirauerit, compromis-
sum fiat, ut scilicet quinque solū ex electori-
bus Præpositum è duobus tantummodo deli-
gant, in quos plura suffragia ex quacunq; dis-
quisitione hætenus collecta concurrerint.
Quod exemplo declaratur: Si enim duo, vel
plures octauum sibi numerum in suffragijs
obtinuerint, vel vnus, aut plures octauum,

alij verò septimum; tunc cæteris omnibus reiectis, horum tantum delectus electoribus habendus est. Ipsi autem Electores quinque compromissarij, quibus scilicet datū est arbitrium deligendi Præpositum, in ipsa tunc simul Congregatione ita sunt deputandi, ut singuli ad eam electionis potestatem plures sibi suffragantes habeant (non enim plura medietate suffragia in ipsis deligendis requiruntur) & ex illis constituentur, qui non fuerint inter primos eligendos numerati. His enim duobus eo tempore, nulla ad huiusmodi electionem relinquitur facultas; Sed actiua simul, ut dicitur, & passiva voce priuantur.

Si quando tandem schedulis eductis compromissarij pares extiterint, electus habeatur, qui debito in Congregatione sibi loco alijs pariter concurrentibus præstat.

Tres annos duret Præpositi munus, & confirmari possit tertio quoque anno, Congregationis arbitrio. Ad eandem mensam, una cum cæteris accedet, & assidebit; nisi impediatur inualerudo.

Nihil singulare habeat in Ecclesia, mensa, cubiculo, domi, forisue præter locum primum, & laicum ex nostris à Deputatis assignandum, qui omnem in eius obsequium conferat operam.

Circa rem familiarem, & bona Congregationis,

tionis, administratione veatur accurata, præstetq; nostris ad victum, & vestitum necessaria. At verò pauperibus, aut alijs, qui non sunt ex nostra Congregatione, quolibet mense nummi aurei summam poterit elargiri. In maiori quidem summa, quotiescunq; eiusmodi largitionum se dederit occasio, quatuor Deputatorum requireret consensum: Cum verò decem nūmos aureos excedere contigerit, totius Congregationis. Idem in alijs cuiuslibet completi operis, aut negotij seruet impen- sis extraordinarijs, & ad victū, aut quotidianum familiæ nostræ vsum nihil attinentibus.

Totius Congregationis gubernandæ, omniumq; curandorum, quæ ad eam spectant, prima potestas sit penes Præpositum: ad ipsum enim solum pertinebit Congregationem, cum opus fuerit, conuocare, tractanda proponere, ritè constituta perficienda curare: exigere quoque rationem actorum, vel agendorum à singulis nostrorum, quibus est aliquod munus, vel onus quomodolibet vbiquè locorum mandatum, & videre, vt singula rectè expédiantur. Conuocabit ad hoc Congregationem quatuor Deputatorum saltem quolibet hebdomada, sine quorum consensu nihil aget, quod spectet ad vniuersalem gubernationem Domus, & eligendos, aut amouendos officiales. A Præposito enim, & quatuor De-

puta-

putatis ceteri officiales, & ministri triennium duraturi eligentur, excepto Confessario, ad quem eligendum plures ex Electoribus convenire debent in ipsa Congregatione proxime post Præpositum, & Deputatos Electos: horum enim nullus ei muneri præficiendus est.

Domesticis autem officiis præfecti, quos officiales dicimus, suis nominibus satis noti, sunt qui sequuntur.

Sacerdos à Confessionibus.

Corrector ex Senioribus, qui secretò corripiat errantes.

Minister, qui rebus domesticis administrandis, Præpositi sententia consulta, & explorata, det operam.

Præfectus Sacrarum, cuius paternæ curæ Sacrarum ministerio assignati committuntur, sicut Ministro ceteri Laici omnes.

Custos Sacrarum.

Præfectus Oratorum, & Adiutor.

Præfectus Sermocinationum in Ecclesia.

Præfectus Cereemoniarum.

Præfectus Musicæ.

Receptatores hospitum duo.

Monitor precum, quas debemus commendatis in mensa Vesperum.

Tyronum Præfectus.

Custos depositæ pecuniæ.

Negociorum domesticorum Procurator, & adiutores.

Bibliothecarius, & adiutor, qui non per-
mittant e communi Bibliotheca libros ex-
trahi.

Minister infirmorum, & adiutores.

Præfectus ædificiorum, & adiutor.

Præfecti corrigendis legentium erroribus
in mensa duobus.

Aromataria Præfectus, & Aromatarius.

Pecuniarum Exactor, & Dispensator.

Custos Supellectilium.

Cellæ Penariæ Custos.

Cellæ Vinariæ Custos.

Custos Triclinij.

Ianitores.

Hos præsertim Congregatio singulos hu-
iusmodi constitutione voluit admonitos.

Nemo minus à Congregatione, seu Præ-
posito, & Deputatis demandatum recuset, sed
omni animi demissione suscipiet. Quod si ali-
qua ex causa sibi recusandum iudicabit, post-
quam ea, quæ senserit, debita modestia, se-
mel, aut iterum exposuerit, nec Præpositus, &
Deputati approbauerint, iniunctum munus
sine vlla amplius excusatione accipiet.

De Deputatis autem cum Præposito eo-
dem tempore eligendis hæc habentur.

Post electionem Præpositi statim eligentur
ei quatuor ex Presbyteris, qui decennium
transegerint in Congregatione, ex quo sunt

admis-

admissi ad primam probationem, & ius habeant eligendi à tota Congregatione, de quorum consensu, vt dictum est, cuncta à Præposito agentur, quæ ad vniuersalem Congregationis gubernationem pertinere ipse iudicauerit.

Ab eisdem ergo Presbyteris omnibus exacti decennij eodem modo, quo supra, vsque ad tertium scrutinium, eligetur quatuor Deputati, singuli separatim, in eadem Congregatione: post tertium verò scrutinium, nullo facto compromisso, duos eligantur, in quos plura fuerint suffragia in illa trina disquisitione collata: Si verò plures pariter concurrant eligendi, duo tantum, cæteris reiectis, ad electionem peruenire possunt; illi scilicet, qui alijs de more præire debeant in Congregatione. Exemplum proponimus. Si scrutinio ter peracto, in octauum alter suffragiorum numerum peruenerit; alter verò in septimum, hos dicimus duos, cæteris omni suffragio priuatis, ad Deputati munus per scrutinium prouehendos. Quod si plures septimum illum numerum obtineant, illi ex eis scrutinio similiter eligendus erit, exclusis alijs, qui debeat eis in Congregatione antecedere: si rursus paria duorum fuerint eligendorum suffragia, is similiter habeatur Deputatus, qui ex instituto alterum inter nostros sit solutus antecire.

Vnus è quatuor Deputatis triennij præteriti (tres enim annos durat, cuiusq; munus) aut etiam, si placebit, duo cõfirmantur in tres alios annos, qui post illos confirmari amplius non possint.

Ex Deputatis item eligetur aliquis à Secretis ex ipsorum consensu Deputatorum, qui singula decreta à Congregatione Vniuersali, vel à Præposito, & quatuor Deputatis in libro ad hæc conficiendo notabit, & literas, ad quos contingeret, scribet. Literæ autem omnes, quæ negotia continent in alio libro sunt exscribendæ.

Deputatorum erit, præterea, cùm Præpositus decesserit, vel finierit eius munus, seniores prædictum mōnere, qui eius vice interim fungitur, vt conuocet ad electionem Præpositi conuocandos. Quod si illè negligat, ipsi conuocabunt.

Si nemine dissentiente ipsis videbitur cessatio muneris concedenda, vel indicenda Præposito ob iustam causam, quatuor è Sacerdotibus exacti decennij aduocabuntur. Quod si his videbitur, iidem conuocent Congregationem, à qua deponatur, & eligatur nouus Præpositus, sicut iam supra dictum est; eodem modo tamen seruato in præposito deponendo, qui in eijsciendis tenendus est.

Singulis annis mense Ianuario aliquis ex

Depu-

Deputatis cum altero non Deputato rationem omnium expensarum, quæ toto anno fiunt, singillatim inibit, eamq; initam in publicæ Congregatione referet, ut appareant omnibus, quæ superiori anno factæ sunt expensæ, pateatq; singulis contractum nè sit æs alienum, & quota sit summa rei familiaris, & bonorum omnium nostræ Congregationis.

De admittendis in Congregationem, & eiiciendis ex ea.

Cap. VI.



Nostræ Congregationis Patres Beati PHILIPPI Institutoris optimi morem secuti, non nisi homines probatæ vitæ, maxime idoneos, & quasi ad institutum natos recipi volunt ad suorum numerum aggregandos, etiam ad hunc modum factis decretis.

Minores duo de viginti annis, ac maiores quadragintaquinque ad primam probationem non recipiantur, neque ij, quos canones ab ordinibus arcent, nisi in ordine laicorum sint omnino permansuri: non infirmæ valetudinis: non ij, qui ingressi sint aliquam Religionem: non

non nisi bonæ apud omnes famæ, qui Oratorij nostri frequentes fuerint auditores, & orationibus interfuerint, & sapius alicui ex nostris Sacerdotibus soliti fuerint confiteri, & experimentum ceperint instituti nostri. In his tamen omnibus, si ita videatur Patribus, qui decennium expleuerint in Congregatione, poterit dispensari.

Duo ex nostris Presbyteris à Congregatione eligentur, qui diligentem adhibeant curam circa eos, qui admittendi sunt in Congregationem; ut vel antequam admittantur, eorum vita, & mores omni studio explorentur. Ea propter crebra cum illis inhiunt colloquia, unâ cum ipsis versabuntur: nec his contenti, ab illis etiam certiores reddantur, qui eiusdem erunt patriæ, & quibuscum anteactio tempore, quàm recipiantur, fuerint versati. Referre autem debent duo electi ad Congregationem iterum conuocandam, quæcunq; de illis habuerint, si quomodo scire intersit, antequam secretò suffragia ferantur.

Præter duos Patres, quos eligendos ad id muneris diximus, alij etiam Patres diligentia cura exquirent, quæ hætenus præfati sumus, & num animo veniant permanendi semper usquè ad vitæ obitum in Congregatione, non alio prætextu, quàm ut Deo inseruiant, & obseruent nostræ Congregationis instituta, seu

constitutiones, quas propterea, antequam recipiantur, legendas Patres offerent, quò rem totam maturiori consilio deliberent.

Quomodo autem oporteat admittendos expeditas habere res suas familiares, & domesticas, habetur cap. 8. Antequam enim per secreta suffragia admittantur, debent esse expediti ad viuendum nobiscum, & habitandum, nè sic admissi extra Congregationem degant, præter tempus dierum aliquot, vt ad summum quindecim.

Admissi ad primam probationem, non continuo tyronibus aggregabuntur, sed mensem, veluti hospites, in nostris adibus morabuntur, vt interim omnia nostra cognoscant, ac maturius deliberent, & è contra ipsorum periculum fiat, si prompti sint in omnibus parere, vel in humillimis, ac durissimis: si exercitationibus Sanctarum meditationum, & Sacramentorum sint à se ipsi deuoti: non contentiosi, non pertinaces, non superbi vlla, omnino in re aduersus maiores, aut etiam minores.

Si bonum sui specimen dederint, post mensem eorum nomina in libro ad hæc destinato notabuntur, & inde annus primæ probationis incipiet, per quod anni spatium, si fuerint in vitæ laudabilis ratione versati, in secunda probatione biennium consistent, alioquin dimit-

dimittentur à Præposito, & Deputatis, quorum est munus ad primam, & secundam probationem admittere. Exacto autem triennio, si laudem simili modo probatę vitę habuerint in cõnuictu, vt esse possint è Congregatione nominatim decernendum est. Aggregabuntur ergo per secreta suffragia, poteruntq; deinceps ad omnia ministeria, excepto Præposito, & Deputati munere, eligi. Ius autem ipsi alios eligendi post decennium solum habebunt, nisi de consensu Deputatorum Præpositus hoc ius ex causa statuerit differendum.

Quod si quis eorum, alia nulla intercedente causa, nisi obliuionis, aut modestię, ad tempus non petierit, quod à Congregatione fuisset accepturus, cum in nostrorum Catalogum admissus referetur, ab eò tempore censetur aggregatus, quo expletum fuerit consuetum triennium, vel decennium.

Admittere ad Congregationem, & ad omnia supradicta pertinebit ad Sacerdotes expleti decennij, & stabitur maiori parti suffragiorum; ad primam tamen, & secundam probationem, vt dictum est, ad Præpositum, & Deputatos.

Nemo possit expelli è Congregatione, nisi primò in vnum locum congregati fuerint omnes Presbyteri, qui decennium exegerint in Congregatione, numerandum à die, qua sunt

admissi ad primam probationem, & singuli suum suffragium dederint, & quod duæ è tribus partibus statuerint, id fiat. Quod si in tres partes non poterit fieri Presbyterorum æqua distributio, tunc seruabitur ratio, quæ est octo ad tredecim, aut quatuordecim, ita, vt octo exempli gratia conficiant duas partes, siuè tredecim sint Presbyteri, siuè quatuordecim.

Nemo possit expelli è Congregatione, nisi propter iteratam, grauemq. pertinaciam, vel graue delictum; sed qualia sint singula huiusmodi, stabitur iudicio duarum partium è tribus numerandarum, vt supra.

De Tyronum institutione.

Cap. VII.



Admissi ad primam probationem, siuè Clerici, siuè Sacerdotes, donec fuerint expleto triennio nostris adscripti, eius curæ commendantur, qui id muneris in Congregatione sustinet. Is ad fructum animorum omnia referens, præter virtutum singulare studium, quarum maximè compotes esse nostros oportet, curer
alia

alia quædam proponere , quæ sunt hæcenus
obseruata , vt videlicet .

Sacro quotidie inseruiant .

A studijs literarum Superioris arbitrio ab-
stineant : Hæc enim moderanda primùm , vt
Diuina sapientia imbuti discant amare nesciri .

Ad mensam signo dato sine vlla mora con-
ueniant , ibiq; ex præscripto, Ministratoris,
vel Lectoris officio fungantur .

Singuli ministrent , vel legant singulis die-
bus , aut hebdomadis , tam prima , quàm se-
cunda prandii , vel cænx hora : qui verò ex
eis Sacerdotes fuerint , ad primam , non nisi
manè ministrare solent .

Lectionem similiter in Ecclesia , vt cuiq;
sua fuerit constituta hebdomada , sermoni-
bus præmittant ; intersint , dum habentur ,
atq; etiam curent, nè quid omittatur eo tem-
pore, quod esse solet instituti . Eam verò mi-
nistrandi , & legendi consuetudinem iam ag-
gregati ad decennium vsquè retineant , vel
circiter , Superiorum arbitrio , Præpositi sci-
licet , & Deputatorum .

Vbi finem sermones habuerint, quorū quo-
tidie duos , vel saltem vnum audierint , vt
etiam valetudini quadam ex parte inseruiant,
in aliquam ambulationem veniant .

Vespero ad orationem in Oratorium se-
conferant .

ref.

A' pran-

A prandio , & cæna animi recreandi gratia per horę spatium eorum quisq; in vnum cum aliis locum adueniat , & omni mitigata feueritate , vultu hilariori , modestè tamen sic se gerat , ne alium , vel ioco tangat .

Si quis eorum per ianitorem accersatur ab aliquo , statim ad portam domus descendat , se paucis expediat , & neminem externorum in cubiculum suum , vel omninò in ædes nostras , infcio superiore , admittat .

Nec domo , nec soli , nisi facultate ab eodem data aliquando exeant .

Nulla externorum negotia , vel quęcunq; in Congregatione degentibus , seù consuetudine , siuè decreto aliquo sunt denegata , siue Prępositi etiam licentia , administrent , aut conficiant .

Ab administratione Sacrorum , ipsoq; Sacratio Festis diebus , vix necessitate cogente recedant .

Altare cuius quisq; curam suscepit , vt tempori congruit , ex vicissitudine Ecclesiastici misterii ornet .

Ter in hebdomada assignato Confessario peccata sua confiteantur , & qui non fuerint Sacerdotes , eius arbitrio Eucharistiam accipiant .

Curent , si quid errauerint , vt spontè se , correctioni subijciant .

De Congregatione autem , ad quam conuenientes in aliqua se culpa esse demonstrant, extat huiusmodi nostrorum constitutio .

Congregatio culparum Tyronum, idest eorum , qui nondum triennium in nostra Congregatione exegerint , siuè Sacerdotes sint , siuè Clerici, singulis fiet hebdomadis , vt scilicet ad omnium communem veniant , & ea hebdomada , in qua non habetur communis , priuatim apud illum , cuius curæ sunt commendati , ad suas culpas coarguendas congregentur ,

Adhibere etiam, loco accusationis iam dictæ , aliquando solent probati cuiusq; auctoris lectionem, ex qua saluberrimis vicissim documentis per communicationem , & diuinorum collationem imbui possint .

De præcipuis nostrorum obseruationibus . Cap. VIII .



De excolendos diuiniore disciplina suorum animos , & ad Christianā , veramq; pietatem magis conformandos hæc præsertim interposita decreta seruat Congregatio .

Ter in hebdomada sua peccata Sacerdoti
ad hoc

ad hoc delecto quilibet confiteatur (nisi aliqua interdum de causa permittatur ab ipso quispiam aliter facere) Hanc tamen consuetudinem à Beato PHILIPPO Patres instituti perutilem ad salutem æternam volunt, & prædicant. Ad Eucharistiam similiter sumendam se parat, sumatq; si videatur eidem, cui confessus fuerit.

Congregatio (vt dicimus) culpæ decimoquinto quoq; die perpetuò fiat, in qua non modò Sacerdotes intererunt, sed clerici, laiciq; omnes nostræ Congregationis, & à nouissimis ad primos quisq; commissam à se aliquam in consuetudine familiari culpam, etiam leuem flexis genibus accusat, & quoquo modo alicuius animum offenderit, petit ab illo veniam. In hac tamen accusatione, publica nulla earum rerum mentio est, quarum secreta apud Sacerdotem debet esse confessio.

Nemo ex Sacerdotibus alios corrigit, qui decennium Sacerdotij non expleuerit in Congregatione.

Statuto igitur die congregatis omnibus, inuocato primùm, vt moris est, à Præposito in Sacris precibus Spiritu Sancto, ille è Sacerdotibus, cuius est ex ordine alios corrigere (solèt enim in huiusmodi munere sibi inuicem succedere) in sella ad Præpositi dexteram locata vocatus assidet, & perbreui sermone ad

inflammandos in Deum animos vtiliter pr-
 misso fungitur in spiritu lēitatis officio Cor-
 rectoris, ac dum clericos corrigit, & Sacer-
 dotes, caput detegit, quod in laicis corrigen-
 dis non solet. Præpositum insuper corrigen-
 dum detecto capite stans admonet.

Laici, & Clerici, vbi suas culpas accusaue-
 rint, correcti, & à Præposito de aliqua vitio-
 sa consuetudine emendanda, vel laudabili re-
 tinenda quàm breuissimè etiam admoniti, si-
 mul discedunt. Singuli deindè Sacerdotes,
 qui adhuc infra triennium approbationem
 expectant, se se culpant; his pariter abeun-
 tibus remanent ceteri Sacerdotes, quorum
 accusatione expleta, & correctione adhibi-
 ta Præpositus Deo gratias agit precibus con-
 suctis.

Præscribetur autem forma, vt dici solet,
 pœnitentiarum, quam in illis conscribendis
 nullo modo transgredi liceat. In schedulis
 autem scriptæ eodem die, quo fuerint accu-
 satæ culpæ, vesperti in triclinio sub cœnæ finem
 per manus è sacculo singulis distribuuntur.

Hac distributione facta, vt sorte obue-
 nerit, ordinatim, & apertè legat coram om-
 nibus quisquè suam.

Eligetur preterea, vt supra diximus, ali-
 quis ex senioribus, qui Correctoris officio
 fungatur. Huius erit vnumquemq; è nostra

Con-

Congregatione etiam Deputatos, & Propositum gl'am corrigere; quod tamen munus omni mansuetudine, & animi lenitate exequetur, se ipsum, ut ait Apostolus, considerans, nè & ipse tentetur, itaut se potius, & vitia sua corrigere videatur, ut hac ratione fratres ad meliorem frugem reducat.

Quod domesticæ tandem disciplinæ studiū postulat, ea hebdomada, in qua nulla est communis accusatio culparum, Laici omnes nostræ Cōgregationis cuius ministerio assignati apud Ministrum convenire debent, ut ab illo erudiantur, & ad tenendam salutis æternæ viam benignè instituantur.

Ad hæc, nè nostri inflammentur avaritia, vel ambitione prolabantur, nè modestiam leniter abijciant, vel temerè auctoritatem teneant, his, quæ sequuntur, constitutionibus, aliqua ex parte cautum est.

Quò Deo, diuinisq; rebus expeditissime quicunq; admittuntur in Congregationem se tradere possint, id maximè videbunt in primis, nè quid litigiosum sit yllo modo in rebus familiaribus, quas habent, sciantq; cuiuslibet anni redditus expendendos in bonos, quos ipsi iudicauerint vsus, neq; quicquam cumulandum; nè quis scilicet è nostra Congregatione vllam curam ponat in diuitijs parâdis; imò verò ex cēsu pro suis cuiq; facultatibus

sibus in commune commodum Congregationis libere conferendum est. Quod a nostris adeo seruatum est hactenus; vt si quis ob inopiam id non praestiterit, vel prestare intermiserit, statim atq; de suo abundantior quoquo modo factus est, pecuniam pro rata portione dare, ac soluere non destiterit; ita eis conueniens, ac consentaneum semper visum est stipendijs proprijs militare, & a rebus etiam Congregationis tanquam ab alienis abstinere, quibus ipsa debet in primis non habentes vnde viuere sustentare suos. Nec propterea pecuniam imperat Congregatio, dum exigit, quod ab hilari datore ex instituto pro victu offertur, idq; etiam prout cuiusq; facultates ferunt.

Possunt etiam Praepositus, & Deputati parrem, vel totum assignatorum prouentuum remittere, si eis videatur aliqua de causa id faciendum.

Omnia secularia negotia interduntur nostris, nisi aliquid iusta de causa manderetur expediendum a Praeposito, & quatuor Deputatis.

Nulli ex nostris, quamuis fuerit requisitus, profiteri licebit sub aliqua Congregatione, vel Societate extra Domum, vel aliquod onus suscipere sine consensu Congregationis.

Cum sint multi in Ecclesia Dei, qui audiendis Monialium confessionibus aut dant

operā, aut dare optimē possūt; propterea ne-
quis ab Instituto Congregationis nostræ pro-
prio possit abduci, statutum est, nè nostrorum
aliquis se se obliget, aut dedat confessionibus
audiendis, moribus reformandis, rebusq; ea-
rum gerendis. Idem dicimus de Seminarijs,
Collegijs, Congregationibus, Societatibus,
aut alijs Vniuersitatibus, rebusq; earum quo-
modolibet tractandis.

Nemo Episcopus, Presul, aut alia quæ-
cunq; ea sit dignitate ornatus recipiatur in
edes Congregationis, vt in ijs vnā cum no-
stris moraturus habiter, etiam si id fiat ad
aliquod tempus.

Nulla Ecclesiastica beneficia petere, aut ac-
cipere vnquam omninò possint: habita olim,
si residentiam personalem non requirant, po-
terunt retinere.

Dignitates vllas nemo possit accipere, nisi
Pontifex iubeat.

Nec licebit absq; Præpositi, & quatuor De-
putatorum consensu frequentare Curias, neq;
officia, vel beneficia pro se, vel pro alijs
exposcere.

Nulli sit proprius famulus: si qua aliquem
necessitas premet, deferet ad Præpositum, qui
vnā cum quatuor Deputatis, quid ei opus
sit, curabit.

Nec sinat quis pueros ingredi cubiculum
C 3 suum,

suum, nisi ducantur ab alijs, qui testes intersint, reliquos admodum parcè admittant, sed vocati deorsum ad illos se conferant.

Non admittatur aliquis ad quoscunq; ordines Ecclesiasticos absq; consensu Sacerdotum, qui decennium exegerint in nostra Congregatione. Eodem modo nec ad sermones habendos, vel ad confessiones audiendas, sicut alibi dictum est.

Nemo librum imprimendum det absq; licentia Præpositi, & Deputatorum.

Nulla lex à Sanctissimo confirmanda proponatur, nisi prius in eam consenserint Presbyteri exacti in Congregatione decennij.

Quando lex aliqua vniuersalis constituenda est, Sacerdotes omnes intersint, qui expleuerint triennium, votumq; consultiuum habeant; decisiuum verò tantum qui decennium compleuerint.

Cum aliquid gerendum proponitur, antea publica, & libera de ea re habeatur à Patribus consultatio; deindè aliquot transactis diebus suffragia erunt secreta, nisi fortè rei necessitas, utilitas, vel etiam aliquando modicitas, expediri statim post consultationem, de Congregationis sententia per secreta suffragia, cogant. Sed sicut dictum est, licet Sacerdotes omnes admittantur, qui exegerint triennium in Congregatione, votumq;

39

consultium habeant; decisum tamen solummodò illi, qui decennium expleuerint.

De vestitu, & consuetudine familiari. Cap. IX.



As præterea constitutiones, & observationes ad externam nostrorum hominum modestiam exhibemus. Ipsi ad interiorem animi virtutem habendam adhibere non negligant.

Nemo ex Fratribus nostris, aut Patribus sericum quicquam in suis vestibus gerat, præter breue, pressumq; verticis operculum, consouendo capiti, & velum interiori pileo insuendum.

Forma item vestium semper seruabitur conueniens clericis sæcularibus.

Nostri laici gerent vestem demissam vsq; ad genua; paulò verò inferius pallium.

Qui ex domesticis impensis vestiuntur, quoties opus fuerit, ministrum adeant, vel, ipso absente, Præpositum, eiq; proponant, quibus indigent; ipsi autem ad subueniendum expositi, quo charitatis affectu valent, eorum petitionibus satisfaciant.

In vestitu, incessu, sermone, actione, ge-

40
fluq; omni decorum seruent, modestiamque
omnem singuli præferant; nulla tamen ap-
pareat nostrorum actio, vt dicitur, singularis
à vulgari, & communi bonorum, & simpli-
cium virorum moribus discrepans.

Quamquam verò nostrorum est consuetu-
do peculiaris, vt se inuicem honore præueniē-
tes, & sibi inuicem obsequentes, quisq; velit
ad demittendum animum infimū inter alios
tenere locum; nè tamen perturbetur quasi
cuiusdam antecessoris, aut ætatum ordo, præ-
sertim publicè in sedendo, & incedendo,
alijsq; actibus huiusmodi, ex Sacerdotibus
præcedent illi, qui priores fuerint Sacerdo-
tes, ex quo admissi sunt in Congregationem,
ita tamen, vt si quis ex clericis exacti trien-
nij, promotus fuerit ad Sacerdotium, tyro-
nibus Sacerdotibus, illis videlicet, qui non-
dum triennium in Congregatione exegerint,
præferantur. Laici autem semper clericis
postponentur.

Post prandium, & cœnam morabuntur om-
nes nostrę Congregationis homines in loco
deputato per horæ vnius spatium, quo ela-
pso omnes in suum cubiculū se se conferant.

In electione vacantium cubiculorum erit
optio penes seniores Sacerdotes, nisi aliter
vñsum fuerit Præposito, & Deputatis.

Domo non egrediatur quisquam ex nostris

finē

sine permisso Præpositi, nisi expleuerit decennium in Congregatione: exacto enim triennio ad hoc usque tempus illos, vel maxime Sacerdotio nondum præditos, Præpositus per se, vel per alium peculiari quadam cura ad virtutum progressus iuuare solet.

Inuitatus ad prandium, vel ad cenam extra domum nemo accedat absque permisso Præpositi.

Nemo externorum ad prandium, vel ad cenam, in scio superiore inuitetur, multo etiam minus hospitio, nisi vno omnium consensu Præpositi, & Deputatorum.

Ex exteris aliquem nullus Patrum, aut Fratrum inuitet ad prædia quæcunque nostræ Congregationis, nec recipiet, ut secum ibi moretur sine consensu Præpositi Congregationis.

Nullus abesse ultra mensem a Congregatione permittatur a Præposito, siue in patriam profecturus sit, siue alio, nisi de consensu etiam Deputatorum.

Nullus est nostra Congregatione in baptismo, aut alio Sacramento quempiam suscipiens.

His aptè, congruenterque addenda sunt etiam nonnulla, quæ diuturna consuetudine recepta, & probata studiosè retinentur a nostris.

Litanias enim in Oratorio vesperi singulis hebdomadis singuli Sacerdotes recitant.

In diuinæ Sacrificio Missæ, non solum singuli quotidie Clerici, Laiciq; deseruiunt, sed Sacerdotes complures, laude quidem digni, sunt administri.

Mensæ præter laicos, & clericos, qui perpetuò ministrant alterni; singuli etiam Sacerdotes vespere singulis diebus ministratores adsunt.

Nequè desunt ex nostris, qui se frequenter ad domos infirmorum hospitales conferant, ut opera sua ægrotantes iuuent.

Domi verò cum quis nostrum ægrotauerit, omnes frequentes adsunt, subueniunt, consolantur, inserviunt, confirmant quam diligentissimè.

Cum autem morti proximus quis fuerit, signo dato conueniunt omnes, tam Sacerdotes, quam cæteri, ut diuinam morienti misericordiam vnanimes exposcant.

Si quando alterum quis verbo offenderit, vesperi inter cœnandum, re dubia iam explicata, flexis in medio triclinio genibus, faciès se reum, veniam ab illo petit, quem offenderit: Is verò assurgens, idemq; faciens, culpam in se saltem conuertit, quod occasionem dederit; iniuriosus autem merita afficitur à Præposito pœna, aliquando leui, aliquando nulla.

Pœnæ autem, quæ culpis in Congregatione
bis

bis in mense accusatis imponi solent, sunt huius ferè generis . Trium priorum Sacerdotù, aut nouissimorum pedes in mēsa deosculari : Psalmum, cuius initium, De profundis, submissa voce, extensis brachijs, vel Psalmum Miserere, coniunctis manibus medio in triclinio recitare : In nouissimo mensę loco recumbere : Humi sedendo cibum capere : Auxiliares preces ab ingredientibus triclinium flexis genibus flagitare ; vel easdem petere ad delenda antè obitum pœnitendo peccata : Antè mensę accubitus aliquid à singulis recumbentibus eleemosynę nomine petere : Secundę mensę ministrare ; vel in ea Lectoris officio fungi : Sacram Beatę MARIE Virginis coronam pro summo Pontifice, aut pro beneficis in Congregationem nostram , aut pro mortuis nostris recitare : Infirmos, qui sunt in domibus hospitalibus, inuisere, & alia his persimiles .

De Triclinio, & communi mensa . Cap. X.



Ssumenda tandem est tractatio mensę ad pium in Triclinio conuietum instructę, vbi singulis nostrum idem genus, eadem portio cibi, potionisq, suppetit

petit: Legitur ipsa Italicè, quandoq; inter cœnandum, arbitrato Præpositi, vel ministri, hoc ferè scripta exemplo.

Cum primum prandij, aut cœnæ datum fuerit, signum, vnusquisq; nostrum in omni prorsus opere, ac negotio cessans, ad triclinium se confert. Inter eundum silentium facit, etiam dum à mensa ad locum peruenerit, in quem homines nostri ad animum recreandum conuenire debent.

In ipso primum ingressu capite inclinato veneratur Imaginem Sacram è conspectu propositam; deindè consueto reuerentiæ signo salutans alios, modestus, ac silens propè mensam, vt suo stat quisq; loco, nec epulas appositas, nec alios ingredientiæ curiosè circumspicit.

Præpositus, vel qui eius absentis locum obtinet, postquam tantisper expectauerit, dum ex cubiculis conuenire huc omnes potuerint, clarè, ac distinctè ex præscripto S. Romanæ Ecclesiæ mensæ benedicit, & in primo loco ipse Præpositus affidet; deindè alij, vt quotusquisq; solet in Congregatione præcedere; Si quis verò tardior, lectione tamen Latina nōdum absoluta, aduenerit, stans propè ianuam orat paulisper tacitus, & Præposito reuerentiam exhibens, proximè post alios omnes affidet: Præposito enim absentis reuerentiæ, &

obse-

obsequii causa, non autem alijs, proprius relinquatur in mensa locus. Post latinam tamen mensæ lectionem non ingredietur, donec ad mensam iterum instructam consueto signo conuocetur, ut ad benedictionem, & gratiarum actiones omnes conueniant. Excipiuntur tamen Confessarii, quibus permissum est festis diebus, etiam absoluta mensæ lectione, ad prandium venire. Mensæ initio donec Præpositus ad cibum capiendum se expediat (antequam enim incipiat; duos ad summum versus lectionis attendit) nemo quicquam attingit in mensa. Cauent etiam ne strepitus à principio nimius audiatur.

Singuli ex nostris ijs contenti erunt, quæ ipsis apponuntur in mensa, nihil præterea exposcentes, vel per se ipsi deferentes, nisi Præpositi, vel Ministri fruantur licentia; qui & promptiores largientur, & prouidebunt, quæ opus esse, & expedire unicuique iudicauerint. Si earum rerum, quæ in mensam inferri solent, & apponi, aliquid cuiquam deerit, ipse quidem per se à ministris exiget, eius tamen curæ potius erit, qui propior confideat.

Fit in mensa silentium semper, modo non incurrat exceptio: fit enim loquendi potestas proponenti, vel respondentibus ad rem dubiam explicandam.

Præterea denunciante post cenam nostro-
rum

rum precibus commendandos; Præposito demum, vel Ministro, cū quid occurrerit, quod Lectori committi non potuerit, nec differri debeat; alioquin silentij lex, qua etiam Præpositus astringitur, est obseruanda.

Nemo in mensa literas legat, nec ianitor eas deferat, vel alicui quicquam denunciet comedentium, Quod si qua imminens vrgeat necessitas, negotium cum Præposito, aut cum eo, qui in illius locum succedit, collatū prius, exequitur ex consensu. Idipsum seruet, donec ex triclinio eò peruentum fuerit, quò animi causa nostri omnes conueniunt.

Post epulas ablata mensa singuli, surgente Præposito, surgunt, & egressi ita stant propè mensam, vt, si commodè id fieri possit, qui sedentes extremos occupabāt locos, stātes occupent medios, & qui sedebant medij, stent extremi, singuli recto consistentes ordine. Præpositus solus dignitatis causa paululum à cæteris disiungitur. Hic igitur situs, & ordo, quo Deo optimo maximo gratiæ referuntur; Quibus peractis egrediuntur bini ex triclinio, vt qui in mensa primus post Præpositum sedebat, ipsi egredienti se adiungat, ac cæteri deinceps eodem ordine.

Nemo in Triclinio, vel in proximo vestibulo, vbi solum ad abluendas manus licet consistere, aliquam prætereà moram faciat.

Le-

Lector, & lectio Mensæ.



Non solum corpori, sed etiam
 menti proprius suppeditari de-
 bet in mensa cibus. Sacra igitur
 antè alios libros leguntur Bi-
 blia; deindè pia quæcunq; com-
 mentaria, vel monumenta, postremò Supe-
 rioris arbitrio, liber alius, in quo vel proba-
 tæ Sanctorum historiar, vel salutaria docu-
 menta Italicè habeantur. Lector autem an-
 tè prandium, vel cœnam in suggesto se,
 librosq; parat ad legendum; stat nudato
 capite, dùm preces adhibentur ad mensam,
 & ubi versum illum protulerit: Iube Domne
 benedicere, expectaueritq; donec omnes con-
 sederint, ipse etiam sedens, recto, ac recto
 capite, clara voce, distinctè, atq; explicatè
 legit. Lectione iam in suas partes sapienter
 distributa, ab vltima non cessat, nisi iussus
 à Præposito; nec is iubet, nisi vltra dimidium
 prandium, vel cœnam. Quod superest in mē-
 sa temporis, in quæstione, vt moris est, po-
 nenda, ac responsionibus declaranda tradu-
 citur. Lectoris erit non modò in mensa, quos
 diximus, legere libros, sed ad rem dubiam
 ponendam inuitare: Singulis item hebdoma-
 dis, semel, vt minimum, eorum, qui benefici
 suc-

fuerint in nostros, scripta nomina recitare ; quæcunq, tandem verbis , aut scriptis à Præposito, seu ministro iussus fuerit, referre : Nihil enim præterea legere , aut nunciare debet, quam quod sibi fuerit ab ipsis impositum. **Correctus.** Lector verba, correctoris eodem syllabarum sono ; quo ille pronunciauit , repetat: Corrector autem ad hoc electus, vocabulum solum, in quo erratum est, corrigere modestè, nec alia verba interponere curet .

Legendi finem Lector faciet, cum Præpositum audierit verba illa pronunciantem : Et reliqua. Tunc ille prolato verbo : Tu autem Domine miserere nobis, & Sacerdos clara voce admonito, cui sit res dubia ex ordine proponenda, descendit, & exhibita Præposito reuerentia assidet in mensa, vt comedat.

Res dubiæ in mensa proponēde.



Post lectionem continuò vnus aliquis ex Sacerdotibus (id enim ipsi singuli, quorum est expletum in Congregatione triennium, præstare solent) singulis diebus mane, & vespere, ex literis Saceris, ex morali disciplina, vel ex præceptis optimæ mentis, & conscientiæ aliquid proponit,

ponit, quod possit in dubium, vel controuersiam venire; cauet tamen, nè quid arduum, obscurum, aut nimis exquisitum ponat, quominus valeant singuli respondere. Si quando tamen aliquis nõ aliud responderit, quàm se aliorum communi iudicio stare, datur id modestiæ potius, quàm inscitiae. Is autem, cui muneris eiusmodi dies obuenerit, etiam si lector, ut moris est, non commonefecerit, per se proponit: Si quis tamen externorum ad mensam vocatus adsit, non nisi iubente Præposito, vel alio in eius locum constituto: nequè enim tum Lector, ut aliàs, ipsum remonere debet. Absenti is ad proponendum succedit, qui proximus post illum in mensa sedere consuevit. Si quis etiam tardior ad proponendum videatur, quod obliuione, vel negligentia accesserit imparatus, Præpositi est exposcere altiori voce, aut vicinioris conuiue submissa commonefacere. Duæ quidem questiones esse solent, quæ dubitationem habentes ponuntur in mensa: explicant alterutram singuli: solus qui proponit, ut omnem dubitationem vltimus tollat, præmeditatus ad utramq; respondet. Respondentium is primus esse debet, qui proponenti proximum inferiorem locum in mensa tenet; deindè alij Sacerdotes expleti in Congregatione triennij eodem ordine. A responsis, quæ debent esse,

quàm breuissima, recedat omnis apparatus, & ostentatio : Proponitur enim explicandum, quod dubium est, omnium nomine, vt quisque quasi discipulus à Præceptore interrogatus respondeat, etiam is, qui proposuit.

Appendix.



E ipsistamen constitutionibus hæc habentur. Si quid ambiguum fuerit in nostris constitutionibus, Præpositus, & Deputati declarabunt: nullo tamen modo possint eas immutare, derogare, aut aliqua ex parte innouare, vel nouas condere.

Appendix primi cap. consultò seposita.



N Oratorio nostro ad Vesperum quotidie, dato signo, lampade, ac luminibus accensis, horologio item arenario super Altare posito antè Sacram Beatæ Virginis MARIAE Imaginem à solemni Christi Domini Resurrectionis die vsq; ad Calendas * Nouembris hora diei xxiv. ex Cal. autem * Nouembris ad

Sanctum Pascha prima noctis orationi præfinita est: Festis verò diebus * etiam secunda; habetur enim sermo, sitq; concētus musicus.

Est autem orandi ritus, vt vbi dimidiam horam taciti in oratione, vt dicitur, mentali traduxerint, accensis ab Aedituo reliquis in Altari luminibus, & signo dato, Sacerdos, ad quem per hebdomadam pertinet, Litanias incipiat, & preces consequentes, alternis etiam multitudinis congregatæ vocibus recitandas, sibi solas reseruans orationes: Cùm verò ad Pacis orationem peruenerit, cuius est initium: Deus, à quo sancta desideria, &c. duo confestim ex oratorij fratribus, vel ministris Sacras clementissimi IESV, ex Altari sumentes imagunculas, Sacerdoti primum genuflexo osculandas præbent: Exosculanti autem, dicentiq; hinc, atq; indè, Pax tecum, inclinato ipsi capite respondent: Et cum spiritu tuo. Deindè singulis, qui sunt in Oratorio, cum salutatione, qua Sacerdos vsus est, eas ad osculum sanctum offerunt. Cæteris interim orationibus absolutis petit ab omnibus clara voce, vt à Deo iugem in eius cultu, & seruitute perseverantiam precentur, quinques secretò orationem Dominicam, & Angelicam salutationem recitantes: dicit enim: Petamus quæso nobis in Diuinis perseverantiam,

tiam, recitantes, &c. His adhibitis precibus petit iterum, vt pro summo Pontifice, Cardinalibus, alijsq; Sacerdotum primarijs pro Christianorum Principum concordia, Fidei propagatione, & hæresum extirpatione, atq; improborum hominum obtinenda conuersione vtramq; bis repetant. Tum indè semel pro fratribus Oratorij vita defunctis precantes illis requiem sempiternam. Postea versu illo prolato: Dominus det nobis suam pacem, Antiphonam Beatæ MARIÆ pronunciat, vel Salve Regina, vel aliam tempori magis congruentem. Tandem, qui pacis osculo per Sacras imagines primùm alios, deindè seipsos inuicem salutarunt, quæcunq; acceperint eo tempore orationibus commendanda, referunt Sacerdoti, qui omnes adhuc obsecrat, vt velint pro eiusmodi rebus orationem Dominicam, & Angelicam Salutationem semel repetere, & Sanctissimum Iesv nomen quinquies inuocare. Eà prece completa, cum ipse versum pronunciauerit: Diuinum auxilium maneat semper nobiscum, & ad osculum vsquè terræ se se omnes inclinauerint, Oratorium dimittitur.

Hic perpetuus est Orationis vsus, exceptis secunda, quarta, & sexta ferijs, tota præterea maiori Hebdomada; His enim diebus ob memoriam flagellorum, quibus

inno-

innocens pro nobis Christus Dominus cæsus fuit, se omnes in Oratorio flagellis cædunt. Est autem consuetudinis, & instituti (nisi huiusmodi dies festi sint, aut hebdomadæ Resurrectionis Domini nostri IESV CHRISTI) vt post horę dimidiæ tacitam orationem, quam mentalem, appellant, statim aliqui ex Oratorij Custodibus, vel Curatoribus flagella ex funiculis crebris contexta nodis distribuentes, missis foras (si qui sint) pueris, ianuis, fenestrisque diligenter clausis, lucernula, tantum accensa, quæ sit intra eius artificij laternam super Altare tunc positam, vt tantum indè Christi cruci affixi nitida, nihil tamen fulgoris emittens appareat imago, cæteris extinctis luminaribus, tenebras obducant. Tunc Sacerdos clara, lugubriq; voce pronunciat versum: Iube Domne benedicere.

Passio Domini nostri IESV CHRISTI sic semper in cordibus nostris.

Recordemini Fratres charissimi, quod Dominus noster IESVS Christus fuit pro nobis venditus, osculo traditus, ad Annam primum, deindè ad Caipham Pontificem ductus, & postremò in Prætorium ad Pilatum, vbi fuit ad columnam ligatus, & flagellatus, spinea corona coronatus, ac veste purpurea circumda-

tus, alapis percussus, atq; consputus, & Iudeis traditus, vt crucifigerent, ad Caluarie locum deductus, & crucifixus, & cum eo crucifixi sunt latrones duo, vnus à dextris, & alter à sinistris; & cum dixisset: Sitio, porrexerunt ei acetū, quod cum accepisset, dixit: Consummatū est, & inclinato capite emisit spiritum (Hic singuli sibi pectus pugno tundunt) Deindē vnus militum lancea, latus eius aperuit, & continuò exiuit sanguis, & aqua, & de cruce depositus fuit in monumento nouo sepultus; tertia autem diē resurrexit à mortuis. Tu autem Domine miserere nobis. R. Deo gratias: Sequitur.

Seruite Domino in timore, & exultate ei cum tremore: Apprehendite disciplinam, &c.

Ad hæc verba arreptis funiculis nudatum corpus tamdiū verberant, donec Psalmi L. nempe Miserere, cum versu Gloria Patri, &c. & Psalmi CXXIX. cuius initium: De profundis, in cuius fine dicunt, Requiem æternā, &c. versus alterni deuotè pronuntiētur. Insuper orationes; Fidelium Deus omnium conditor, & redemptor, & Deus qui culpa offēderis, &c. ad cuius finem fit, signo dato, flagellorum finis. Sacerdos autem ad orationem Dominicam, & ad salutationem Angelicam quinquies repetendam hortatur: deindē bis pro Pontifice, &c. & semel pro fidelibus defunctis,

ctis, &c. ad eundem planè modum, quo alijs diebus orare solent, in quibus abstinent à verberibus. Hoc interim spatium singuli in tenebris, & silentio suis se vestibibus induunt. Post hæc Cantici Simeonis videlicet: Nunc dimittis seruum tuum Domine, &c. versus alternos recitant. Parat interim se Custos, ut, cum illa verba audierit: Lumen ad reuelationem gentium, &c. laternam aperiens, lumina rursus accendat. Sequitur Sacerdos orans: Da pacem Domine, &c. & oratione illa absoluta: Deus, à quo sancta desideria. &c. offeruntur ad pacis osculum Imagines Sacræ eodem penitus ritu, quo alijs ferijs. Additis interim orationibus alijs cōsequentibus, subdit orans; Dominus det nobis suam pacem: Respondent: Vitam æternam Amen. Postremò Sanctam Virgine Deiparam salutant Antiphona consueta, ut anni tempus aptè, congruenterq; postulat: itemq; cætera, ut in alijs ferijs, in quibus nullus est flagellorum vsus.

Exercitationes, in quibus versari solent Dominicis diebus.



Aditus, vel quiuis alius Custos matuturè diebus Dominicis fores Oratorij manè aperit: Lector succedit ad le-

titandum librum optimi cuiuspiam argumē-
 ti, ac salutaris tractationis, donec frequentio-
 ri concursu facto. Præfectus, vel adiutor flexis
 genibus ad piè meditandum aliquid propo-
 nit; postea Litanias, ac cæteras orationes
 prosequitur, sicut Vespèri moris est quotidie
 facere. His absolutis vnus aliquis Sacerdo-
 tum, qui ad audiendas confessiones non sunt
 deputati, ex Euangelio Sermōnem habens ad
 diem recurrente, simplici stylo, ad peccata
 cauenda, ad optimos mores retinendos, ad
 omnem deniquè conseruandam pietatem, ho-
 ra non amplius dimidia adhortari solet au-
 ditores. Sermone habito, & oratione Domi-
 nica, Angelicaq; salutatione repetita inter-
 rogat Præfectus, adsit nē aliquis, qui nouerit
 quempiam ex fratribus ægrotare, vt statim
 ad hoc muneris delectos, vel quos maluerit,
 mittat, qui languentem visitent, consolentur,
 mœrore, vel inopia subleuent, ad peccatorum
 confessionem, atq; ad dolorem patienter, pla-
 cideq; ferendum hortentur. Infirmi fratris
 nomen, & habitatio scribitur in tabella, nē
 visitationis, & orationis prætermittatur of-
 ficiū. Septem deinceps ex fratribus ad sep-
 tem Urbis Ecclesias religione, & sacris Pon-
 tificum Indulgentijs toto Orbe celebres, ac
 tres ad tria publica infirmorum hospitia mit-
 tuntur, vt quisquē suam, quæ sortitò oblige-
 rit,

rit, vel Ecclesiam, vel domum hospitalem
semel infra hebdomadam visitet: Festis enim
diebus ad hæc pietatis officia ferè omnes cõ-
meant. In his autem exercitationibus im-
pendunt ferè horam cum dimidia. Die au-
tem Dominica quæcunq; vltima mensis erit,
præmonentur, vt ad Sinaxim se præparent,
ad Eucharistiã scilicet sumendam: hoc enim
Sacramento prima quauis die mensis Domi-
nica se communiunt, & à prandio in Orato-
rio, vel in schedulis compendiarie quædam
documenta scripta, vel Sanctorum Imagines
chartaceæ distribuuntur, vt suam quisq; ac-
cipiat, & quid per Sanctum, cuius imago si-
bi obtigit, à Domino petere debeat, subscri-
ptum in illa cognoscat.

Aliæ à prandio exercitationes,
tàm in Dominicis, quàm in
alijs Festis diebus.



Post officium Vespertinum festis qui-
busq; diebus in Ecclesia nostra de-
cantatum, & sermonem habitum,
statim ex Presbyteris nostris, ac Lai-
cis, cum externis Oratorij fratribus, alijsq;
plurimis ad suburbanum peculiarem locum

frequentes conueniunt, vbi super herbam confidentes, primum, qui musici sunt, pium aliquod, sacrumuè carmen concinunt; deinde quispiam sermonem non minus pietate, quam elegancia ornatum, ab Oratorij Præfecto in scriptis traditum, recitat memoriter: Quo habito rursus concinunt. Surgit post hæc Oratorij Præfectus, vel alius, cui sit à Patribus demandatum, qui aliquod ad piè, christianeq; viuendum quam breuissimè proponens argumentum, alterum ad dicendum inuitat, ac deinceps tertium, imò, si tempus id postulet, etiam quartum, qui omnes ad rem propositã pari breuitate, ac pietate ad suam, & audientium vtilitatem fermocinantur. Cũ fuerit dicendi finis, hymnus concinitur, ac demum omnes ad propria, vel ad Oratorium reuertuntur. Dùm verò per æstiuæ caloris molestias ad huiusmodi loca non licet exire, in aliquod Templum ad eas exercitationes se se conferunt. At hyeme ex Calendis Nouembris vsq; ad Sanctum Pascha Festis diebus vespere ad salutationis Angelicæ signum in Oratorium itur. Durat dimidiam horam mentalis oratio, Litanix recitantur, vel à musicis concinuntur: Oratio Dominica, Angelicq; salutatio ad solitum numerũ * repetuntur: Antiphona Sanctæ MARIAE Virginis pro-

tem-

* Cum sit concentus musicus, trina est hæc repetitio.

temporis opportunitate mutata canitur, piū aliquod canticum musicis legibus concinitur. Sacerdos ex nostris, quotusquisq; est in serie sermocinantium, Dei verbum adstāti populo, qua potest vtilitate, ac facilitate, per dimidiæ horæ spatium ministrat: rursus concentus efficitur: Ter prece consueta oratur Deus, Virgoq; Deipara salutatur, ac cætus dimittitur.

Externorū in Oratorio munera:



EX externis Oratorij Fratribus eligitur à Præfecto in primis Rector, qui aliorum officijs præsit; Aeditui, vel custodes duo, aut quatuor, qui Oratorium scopis verrant; lampades, & candelas accendant, flagellorum, horologij, & Altaris ornandi curam gerant. Duo item, vel quatuor ægrotantium curatores, qui infirmos fratres visitent; aliqui etiā eliguntur, qui oblatam spontè pecuniam, vel ægrotantium fratrum, vel domorum hospitalium, vel demum Oratorij commodo sincere, ac diligenter attribuant; nec omninò accipiant, nisi quā sciunt spontè oblatam, ut illud Apostoli dictum re vera seruetur: Non

vestra, sed vos. A secretis etiam aliquis deligitur, qui in libro quæcunq; tractantur, notat. Præterea Lector, qui pias lectiones diebus festis præmittit orationi. Ad infirmos item, qui sunt in Valetudinarijs, quolibet festo die perferunt corporis refectioni vtilia, Medico probata.

Expensarum autem Rectori, & Oratorij Præfecto singulis mensibus, imò quoties eis libuerit, rationes ex præscripto referant: Nihil enim iuris, aut potestatis est hominibus exteris, & laicis in Oratorij rebus, præter administrationem à Præfecto Oratorij traditā.

Horum electionis Ordo.



Varto quoque mense eliguntur exteri Fratres ad eiusmodi munera, hoc planè modo. Oratione Dominica, & salutatione Angelica recitatis, his Præfectus solet precibus Diuinum auxilium inuocare, videlicet: Veni creator Spiritus, reple, &c. Respondetur: Et tui amoris, &c. Vers. Emitte spiritum tuum, & creabuntur: Respondetur: Et renouabis faciem Terræ. Oratio: Deus qui corda fidelium, &c. Actiones nostras, &c. Declaratis, & publicatis recitatur hymnus.

Te Deum , &c. Antiphona Beatæ Mariæ ,
 Oratio : Gratiam tuam , &c. Antiphona. Da
 pacem , &c. Oratio : Deus, à quo Sancta de-
 sideria, &c. Item oratio Dominicæ, eo tempo-
 re recurrentis, vël Sancti , cuius festum cele-
 brari contingat. Electis pia aliqua documen-
 ta , aut obseruationes breuissimè leguntur .

Admonitio .



Vm sit Congregationi nostrę
 liberum omnes grauitè de-
 linquentes , vel statum eius
 perturbantes, de conuictu ,
 & familiā suorum dimoue-
 re, ac depellere : Cum satis
 item persuasum sit vix quę-
 quam suę negligentem salutis diu perman-
 surum, vbi & progressus ad virtutes, & per-
 fectorum pia æmulatio esse debet, Beatus In-
 stitutor asseruit , neminē penitus has consti-
 tutiones obligare ad peccatū velle. Ipse Deus
 arbiter, præmia pro pietatē daturus æterna ,
 sit sua nobis benignitate propicius. Amen .

Finunt Instituta Cōgregationis Beati Phi-
 lippi, siuè Oratorij Romani S. MARIAE in
 Vallicella, Sanctę Sedis Apostolicę auctorita-
 te condita, recognita, & confirmata .

ANTE CONGREGATIONEM.



Eni sancte Spiritus reple-
tuorum corda fidelium, &
tui amoris in eis ignem ac-
cende.

Ÿ. Emitte spiritum tuum,
& creabuntur.

R. Et renouabis faciem terræ.

Ÿ. Memento Congregationis tuæ.

R. Quam possedisti ab initio.

Ÿ. Domine exaudi Orationem meā.

R. Et clamor meus ad te veniat.

Ÿ. Dominus vobiscum.

R. Et cum spiritu tuo.

O R E M V S.



Eus, qui corda fidelium sancti
Spiritus illustratione docui-
sti: da nobis in eodem Spi-
ritu recta sapere, & de eius
semper cōsolatione gaudere.

Actio



Ctiones nostras quæsumus Domine aspirando præueni, & adiuuando prosequere: vt cuncta nostra oratio, & operatio, à te semper incipiat, & per te cæpta finiat. Per Christum Dominum nostrum. Amen.

POST CONGREGATIONEM.

℣. Tu autem Domine miserere nobis.

℞. Deo gratias.

O R E M V S.



Eus cui proprium est misereri semper, & parcere, suscipe deprecationem nostrā vt si quid in hac tua Congregatione erroris cōtraximus, miseratione tuæ pietatis absoluat. Per Christum Dominum nostrum. Amen.

Pater noster. ℣. Et ne nos. ℞. Sed lib.

℣. A porta inferi. ℞. Erue Domine.

Re-

℣ Requiescant in pace. R. Amen.

℣ Domine exaudi orationem meam.

R. Et clamor meus ad te veniat.

℣ Dominus vobiscum.

R. Et cum spiritu tuo.

O R E M V S.



Eus veniæ largitor, & humanæ salutis amator, quaesumus clementiam tuam, vt nostræ Congregationis fratres propinquos, & benefactores, qui ex hoc sæculo transierunt, beata Maria semper virgine intercedente, cū omnibus sanctis tuis, ad perpetuæ beatitudinis consortium peruenire concedas. Per Christum Dominum nostrum.

Amen.

Fidelium animę per misericordiam Dei requiescant in pace! Amen.

L A V S D E O.

Instituta Congregationis B. Philippi, siue
Oratorij Romani S. Mariæ in Valli-
cella summatim collecta.

Ex procæmio.

B. Philippus Neri eam Congregationi
seculariũ Presbyterorum ab se fundatæ viam
commõstrauit, qua inflãmati ad pietatem hu-
mana despicerent, & Christi amore feruentes
progredierentur ad diuina.

Ex cap. i. De Oratorio, & Oratione.

I In Oratorio nostro etiam exteris quibusq;
viris exposito quotidie vespere post horã dimi-
diam piæ precationi, vel meditationi in silentio
datam Litanie recitantur, ac preces consequen-
tes, adiunctis oratione Dominica, & Angelica
salutatione quinquies pro perseuerantia in di-
uinis obtinenda, bis pro summo Pontifice, Car-
dinalibus, Sacerdotumq; Primarijs, pro Chri-
stianorum Principum concordia, hæresum ex-
tirpatione, & improborum hominum ad Deum
cõuersione, semel pro mortuis Oratorij Fratri-
bus, semel item ex voluntate, & intentione ad-
stantiũ, etiã IESV nomine quinquies inuocato.
Certè postremam hanc precem aliqua ex Anti-
phonis Beatæ MARIÆ cum Oratione debet, vt
tempori congruit, antecedere, & osculum terræ
subsequi ad Oratorium dimittendum. 2.

Porro secunda, quarta, & sexta ferijs, tota

† præ-

præterea maiori hebdomada ad voluntariâ corporis castigationē pro Litanys adhibentur flagella. 3. Dominicis quidem, alijsq; diebus Festis, in quibus nullus est usus eiusmodi supplicij, litanys expletis, ac precibus, sermo familiaris additur, cōcētusq; musicus. 4. Aestiuo aut tēpore scilicet à Resurrectione Domini nostri IESV Christi ad Kal. vsq; Nouembris, post vespervas, ac sermonem in Ecclesia nostra habitum, locus eligitur suburbanus, vel alia intra Vrbem Ecclesia, ubi orationibus, ac litanys exceptis, monita salutis familiari sermone breuiter proponuntur, concētusq; sacer interuenit ad animos recreandos. 5. Præter hæc exteris communia, alia etiam tempora nostris esse debent ad meditando præstituta. 6. Dominicis quoque diebus manē recitatis litanys, habitoq; sermone eliguntur ab Oratorij Præfecto, vel eius adiutore, qui certas Ecclesias, vel Domos Hospitales infra hebdomadam aliquādo visitent, præstētq; pietatem, quæ festis quibusq; diebus ibi manē frequentiores inservire agrotis, atq; vtilia medico probata reficiendis deferre solent, ac ministrare. 7. Præfectus autem Oratorij è sacerdotibus nostris constitutus ex exteris eligit fratribus Rectorem, & alios officiales, quibus nihil iuris, ac potestatis præter administrationem permittit in Oratorio: eius enim gubernatio nostræ annexa eodem penitus modo ad Congregationis Præpositum pertinet.

Ex cap. 2. De Ecclesia, & diuinis officijs.

1. Sacerdotes nostri sacras in Ecclesia confessiones excipiunt. 2. Diuina mysteria confluentibus præbent. 3. Missæ sacrificium singuli quotidie faciunt. 4. Statuas mortuorū in illa non permittunt. 5. Diebus festis missam, & vesp̄as solemniter celebrant. 6. Pro cuiusq; celebritate festi statutos ab Ecclesia ritus obseruant. 7. Sanctos Patronos, & quorum insignioribus reliquijs aucti sunt, singulariter venerantur. 8. Ad ecclesiastica officia decantanda, & cæremonias representandas celebriorū solemnitate in Ecclesiæ chorū de more conueniunt. 9. Post obitum aggregati cuiusq; præter exequias officium defunctorum, missamq; solemnē singuli Sacerdotes ter pro illo sacrificium faciūt, qui verò Sacerdotes non sunt, Sacram B. MARIAE Virginis coronam nouies recitāt. 10. Pro defunctis item Congregationis infra octauam omnium Sanctorum celebrant quotānis missam solemnē. 11. Pro mortuis autē exteris non celebrant solemnī apparatu, nisi eximia fuerint dignitatis, vel de Congregatione optimē meriti, & cōsensus Præpositi, ac Deputatorum accesserit. 12. De re sacra perpetuo agenda nulli, nisi ex iustissima causa, recipiunt legatum. 13. Ex Cōfessarijs quotidie aliquis moratur in Ecclesia, Festis autem diebus, feria 4. & 6. manē ad horā vsq; prandij omnes excubāt. 14. Admittendos ad sacras Confessiones audiendas

Presbyteri eligunt exacti in Congregatione decennij .

Ex cap. 3. De salutari familiarium sermonum vſu .

1. In Ecclesia nostra quotidie , præter diem sabbatum, pia alicuius libri lectione præmiſſa, quatuor è Sacerdotibus noſtris ad dicendum delectis, ordinata ſucceſſione , ſemihora horologio arenario ſingulis præſinita, familiares, et vtilis de diuinis rebus ad populum ſermones habent. 2. Feſtis autem diebus vnus ſermocinari debet poſt veſperas decantatas . 3. Expletis ſermonibus ſemper fit concentus muſicus . 4. Ex noſtris ad ſermocinandum idoneos Presbyteri eligunt expleti in Congregatione decennij . 5. Ex exteris nullus a ſermones habendos inuitari debet , niſi de Prepoſiti , ac Deputatorum conſenſu .

Ex cap. 4. De ſtatu Congregationis Oratorij perpetuo .

1. Hic ſtatus eſt Congregationis conſtans , & immutabilis , vt noſtri nullis votorum , iuriſiurandi , aut promiſſionis vinculis alligentur . 2. qui ſecus fecerint, inſtituto noſtro , bonisq; priuantur. 3. Alias item Congregationes, loca, vel collegia gubernare, aut aggregare nullo modo poſſunt . 4. Sed qualibet Congregationis domus , vel familia , noſtræ formam imitata ſe per ſe regat , & moderetur .

Ex cap. 5. De Præpositi, & Deputatorum
electione, & munere.

1. Is in Præpositum eligendus proponitur, qui ad annum suæ ætatis quadragesimum pervenerit, in Congregatione quindecim saltem annos permanserit, & Deputatus, vel Minister fuerit. 2. Eligi potest etiam absens, sicut ceteri officiales. 3. Electores sunt omnes Sacerdotes expleti in Congregatione decennij. 4. In electione, absentiaq; Præpositi præesse debet, qui primum tenet in Congregatione locum post Præpositum. 5. Debent in eius electionem electores conspirare medietate plures, qui eductis è vase schedulis, & aperte lectis, si scrutinio decies repetito non dum conuenerint, compromissum facient, ut scilicet quinque ex electoribus unum ex duobus, in quos plura suffragia concurrerint, eligant: Compromissarijs verò singulis plura, quàm alijs, sibi data suffragia sufficiunt, ut Præpositum eligere possint. 6. Præpositi munus tres annos durat, & Congregationis arbitrio confirmari potest. 7. Nihil penitus habere debet singulare domi, forisue, præter locum primarium, & sociū ex nostris Laicum. 8. Nihil absque Deputatorum approbatione potest extra impensas familiae consuetas, & quotidianas, etiam elemosinæ nomine largiri, præter summam aurei nummi quotibet mense, nec excedere decem, nisi Congregationis convocata accedente consensu. 9. Pri-

ma potestas gubernanda Congregationis est penes Præpositum, qui Congregationem Deputatorum qualibet hebdomada conuocat, nihil enim sine horum consensu agit, quod ad uniuersalem gubernationem Domus pertinere iudicarit, aut officialium creationem, & amotionem: Præpositus enim, & Deputati præter Cōfessarium à Congregatione tota eligendum, cæteros officiales, & præfectos constituunt; ut Correctorem ex Senioribus; Ministrum rebus domesticis; Præfectū Sacrarij, & custodem; Præfectum Oratorij, & adiutorem; Præfectum sermocinātium; Præfectum caremoniarum; Præfectum musicæ; Receptatores hospitum duos; Monitorem ad preces commendatis debitas; Præfectum Tyronum; Custodem pecunie depositæ; Procuratorem, & adiutores; Bibliothecarium, & adiutorem; Præfectum adificiorum, & adiutorem; Præfectum Lectoribus corrigendis; Præfectum Aromataria, & Aromatarium; Exactorem pecunie, & Dispensatorem; Custodem Supellectilium; Custodem cellæ penariæ; Custodem cellæ vinariæ; Custodem triclinij; Ianitores. 10. Admonentur autem nostri, ne munus à Congregatione demandatum recusent. 11. Deputati ex Presbyteris expleti in Congregatione decennij post Præpositum eliguntur ab eisdem Presbyteris exacti etiam decennij, eodem modo, quo Præpositus, usq; ad tertium scrutinium, quo factō, si
qua

qua restat adhuc electionis controuersia, duo
seliguntur, in quos plura suffragia hactenus
conuenerint; & licet paribus concurrant, is
alteri semper in electione prapponitur, qui de-
bito sibi loco in Congregatione prapstat. 12. Ex
Deputatis triennij prateriti unus, vel duo in
alterum triennium confirmari possunt. 13. E
numero Deputatorum unum à secretis de alio-
rum consensu Prappositus eligit. 14. Prappositi
cessante munere à Deputatis monetur senior iā
dictus, ut ad electionem Patres conuocet; hic
si negligat, ipsorum est conuocare. 15. Si nemi-
ne Deputatorum dissentiente Prappositus ex iu-
sta causa sit à Congregatione deponendus, an-
tequam conuocetur Congregatio, requiritur
etiam consensus quatuor Sacerdotum exacti in
Congregatione decennij. 16. Singulis annis
mense Ianuario ab uno Deputatorum cum al-
tero non Deputato sumptuariæ rationes expleti
iam anni subducuntur, & corā tota Congre-
gatione leguntur, ut omnibus appareat expen-
sarum summa, ac rei familiaris.

Ex cap. 6. De admittendis, & eiiciendis.

1. Non admittuntur ad probationem, nisi
cognite probitatis, bonæ valetudinis, ac famæ.
2. qui experimentum nostri ceperint Institu-
ti; Ecclesiam, & Oratorium nostrum, & Con-
fessarium ex nostris frequentarint. 3. Reli-
giosa vitæ Institutum, vel probationem nō su-
sceperint. 4. Non minores 18. nec maio-

res 45. annis. 5. Promouendi etiam ad Sa-
cros Ordines debent esse liberi ab omni Eccle-
siasticorum Canonum impedimento. 6. De his,
& similibus licet singuli nostrum exquirant,
duo tamen eliguntur Presbyteri, qui admit-
tendos diligenter interrogent, & ad Congrega-
tionem intè secreta suffragia referant, quicquid
eius interesse viderint. 7. Instituta nostra,
vel Constitutiones legendas accipiunt, & nō nisi
rebus expeditis ad habitandum inter nostros
venire permittuntur. 8. Vbi verò suffragijs
approbati fuerint, non amplius diebus quindecim
extra Congregationem degere possunt. 9.
Recipiendi etiā tamquam hospites, ut moris est,
& post mensem, si digni inueniantur, eorū no-
mina in libro notanda: & inde prima incipit
probatio, quæ est anni unius; Secūda verò duo-
rum. 10. Intra hoc triennium à Prapósito, &
Deputatis, quorū est aī eas probationes admit-
tere, possunt, interueniente causa, ex Congrega-
tione dimitti. 11. Et exaēto triennio de eorū
aggregatione nominatim per secreta suffragia
Patres congregati decernunt. 12. Aggregati
verò ad omnia ministeria possūt eligi, exceptis
iam dictis superiori capite; sed ipsi alios eligere
non nisi post annos decem. 13. Qui admitti, vel
aggregari ex modestia, vel obliuione nō petie-
rint, censentur admissi, vel aggregati debito sibi
loco. 14. Admittere ad omnia supradicta, ex-
cepta prima, & secūda probatione, ad Sacerdo-

tes pertinet expleti in Congregatione decennij. staturq; maiori parti suffragiorum. 15. Expelli nemo potest aggregatus, nisi Presbyterorū expleti in Congregatione decennij duæ è tribus partibus id statuerint, propter iteratam, grauemq; pertinaciam, vel graue delictum.

Ex Cap. 7. De Tyronum institutione.

1. Tyronum nostrorum peculiare est amare nesciri, colere pietatē, studio magis virtutum, quàm literarum teneri. 2. Ad mensam Lectoris, vel ministratoris officio fungi. 3. Sermonibus habēdis in Ecclesia lectionē præmittere, interesse dum habentur, & curā consuetam, ac debitam adhibere. 4. In aliquam post sermones deambulationē venire. 5. Vesperis in Oratorij: à prandio verò, atq; à cena ad animū grata cōsuetudine releuandum cū alijs conuenire. 6. Legendi, ac ministrandi consuetudinem ad decennij usq; retinere. 7. Neminē externorum in cubiculum suū, vel omninò in aedes nostras infcio Superiore admittere. 8. Nec domo, nec solos, sine data sibi facultate exire. 9. Nulla externorū negotia, nisi etiā de Præpositi licentia suscipere, vel administrare. 10. Festis diebus sacris ministerijs operā dare, atq; ad ea explenda in Sacratio, cū opus fuerit, commorari. 11. Altaria pro cura suscepta opportunè ornare. 12. Correptioni se spontē subycere. 13. Ea hebdomada, qua cōmunis Congregatio, ut dicitur, culparū non habetur, ad suas culpas coarguendas

das apud illum, cuius cura sunt cōmendati, cōgregari, vel huius accusationis loco, cū illi visum fuerit, piā probati cuiusq; Auctoris lectionem, vel aliquam diuinorum collationem interdum adhibere.

Ex Cap. 8. De Præcipuis obseruationibus.

1. Nostri ter in hebdomada sacra confessionis salutare remedium adhibent. 2. Diuinam Eucharistiā arbitrio Cōfessarij accipiunt. 3. Ad publicā culparū accusationem, quæ scilicet sacra, ac secretā confessionē nihil attingit, decimo quinto quoque die simul omnes conueniunt. In ea accusatione, inuocato primū à Præposito in sacris precibus Spiritu Sancto, deinde præmissa à Correctore perbreui sermone, singuli à nouissimis ad primos se genibus flexis accusant. Fugitur officio correctoris in spiritu lenitatis, ex ordinata vicissitudine, quisquis sui in Congregatione Sacerdotij decennium expleuerit. Laici ubi correcti fuerint, simul recedunt; similiter & Sacerdotes nondum aggregati; ceteri remanent, donec expleta accusatione sua Præpositus Deo gratias agat precibus consuetis. 4. Præscribitur & forma penarum, quæ scriptæ in schedulis, sub cana finem eo dē die è sacculo singulis ordinatim distribuuntur, ut legat apertè quisque suam. 5. Præter publicas admonitiones constituitur ex senioribus sacerdotibus aliquis, qui leniter, ac secretò unumquemq; è nostra Congregatione etiam Præpositum corripiat.

gat. 6. Ea hebdomada, in qua nulla est communis accusatio culparum, Laici omnes nostri simul congregati statuto die, atq; hora à Ministro erudiuntur. 7. Nostri prater eam nullam litem, aut controuersiam de re familiari cum aliquo habere debent. 8. Nec quicquam cumulare possunt; immo ad victum, & commune commodum liberè contribuunt, stipendijs proprijs militantes, nec audent intermittere pecunie assignationem, nisi ex causa Præpositus, & Deputati remittant. 9. Ab omni seculari negotio, nisi quid mandetur expediendum, abstinent. 10. Externa onera Collegiorum, Societatum, Monialium, & his similium nullo modo suscipiunt. 11. Comorandi diuersorium apud se Præsuli nulli concedunt. 12. Ecclesiastica, beneficia, & dignitates non suscipiunt, nec retinent olim habita, si personale residentiam requirant. 13. Non solum beneficia, sed etiam officia pro se, aut alijs exposcere vetatur. 14. Curias item frequentare nulli licet, absq; consensu Præpositi, et Deputatorum. 15. Nulli nostrum proprius famulus esse potest: necessitate oppressis Præpositus, & Deputati prouident. 16. Aditus in ades nostras pueris denegatur, nisi cum eis alij ductores perpetuò maneant: cæteris admodum parce conceditur. 17. Sacros ordines recipere, sermones habere, sacras confessiones audire ex nostris nemo potest, nisi consensus totius Congregationis accedat. 18. Typis liber nullus potest à nostris mandari, sine Præpositi, & De-

¶ Deputatorū licentia. 19. Nullius legis cōfirmatio à Sanctissimo peti potest, sine Patrum consensu, qui decennium in Cōgregatione peregerint. 20. Si qua lex vniuersalis cōstituenda, Sacerdotes omnes intersunt, modò trienniū expleuerint in Congregatione; habent enim votū consultiuum. 21. Rerum gerendarum consultatio primū habēda est; deinde post aliquot dies repetenda, nisi instanti necessitati, utilitati, aut etiam modicitati concedere Congregatio velit. Ex c. 9. De vestitu, & consuetudine familiari.

1. Formam in vestibus clericis secularibus congruentem nostri seruant, eamq; modestiam exhibent, ut nihil sericum quis gerat, excepto interioris pilei velo, ac breui, pressoque verticis operculo. 2. Vestem Laici usq; ad genua, palliumq; demissum paulò inferius gerunt. 3. Curat presertim minister, ne quid desit ijs, qui domesticis vestiuntur impensis. 4. Eam in omnibus modestiā, decorumq; seruāt, ut cuiusq; singularitatis vitio careant. 5. Honore se inuicē præueniunt, obseruantes alioquin anteceffionis ordinē, ut è Sacerdotibus ille præcedat, qui diutius in Congregatione Sacerdotio functus est: Clerici autē aggregati, statim atq; Sacerdotes fuerint, alios Sacerdotes non aggregatos antecire debēt; Laici verò semper Clericis postponentur. 6. Tām à prandio, quàm à cēna horam circiter animi gratia simul omnes cōmorantur. 7. Vacantiū cubiculorum optio senioribus datur, arbitrio

vitrio tamen Prapofiti, & Deputatorũ. 8. Nul-
 lus antè decennũ in Congregatione exactum,
 nifi Prapofito annuẽte, domo egreditur. 9. Nul-
 lus, nifi Prapofito permittente, ad externorum
 mendas vel inuitatus accedit. 10. Nec externi
 ad mensam noſtrã eodem inſcio debent inuita-
 ri. 11. Hoſpitiõ nullus excipitur, nifi aſſentiẽ-
 tibus etiam Deputatis. 12. Ad cõmorandum in
 prædijs noſtris exteri ſine licentia Prapofiti nõ
 admittũtur. 13. Abſentia noſtrorũ ultra menſẽ
 non niſi Deputatis aſſentientibus permittitur.
 14. Nullus ex noſtris in baptiſmate, aut alio
 Sacramento quẽpiã ſuſcipere debet. 15. Lita-
 nias in Oratorio ſingulis hebdomadis ſinguli Sa-
 cerdotes veſperi recitant. 16. In Miſſa ſacrifi-
 cio frequenter inferuiunt. 17. Ad Sermones au-
 diendos ſedulò conueniunt. 18. Noſtris agrotã-
 tibus præſentia, et miniſterio nõ deſunt. 19. Mo-
 rientibus ſigno dato cõuenientes diuinã miſeri-
 cordiam expoſcunt. 20. Hoſpitales infirmorum
 domos arbitrato quiſq; ſuo viſitat. 21. Ad cenã
 ſingulis diebus ſinguli miniſtrant. 22. Si quan-
 do fratrem læſerint, petita ſub cenã finẽ publi-
 cẽ venia placant. 23. Pænã autem, quæ ſchedu-
 lis diſtribuuntur in menſa pro culpis bis in mẽ-
 ſe accuſatis, ſunt huius ferè generis: Pedes pri-
 morũ, vel nouiſſimorum oſculari: Pſal. Miſe-
 rere, vel De profundis, ſubmiſſa voce, & geni-
 bus flexis recitare: humi ſedendo cibum capere,
 & alia bis perſimiles.

Exc. 10. De Triclinio, & communi mensa.

1. In mensa singulis nostrum cibi, ac potionis idem genus, eadem portio. 2. Dato prandij, aut cane signo, statim omnes in silentio conveniunt ad triclinium. 3. Ingressus sacram imaginem propositam inclinato capite venerantur. 4. Modestus, ac silens suo stat quisque loco, donec Præpositus, vel qui eius locum absentis obtinuerit, Ecclesiastico more, idest Romano, mensæ benedixerit. 5. Soli Præposito relinquitur in mensa locus; quisquis alius tardior advenit, exhibita illi reuerentia, proximè post omnes alios assidet: post latinam lectionem secundam mensam expectare debet: Festis autem diebus Confessarij ad primam prandij arbitrato suo venire possunt. 6. Mensa initio rerum appositarum nemo aliquid attingit, Præposito prior. 7. Nihil præterea quam quæ apponuntur, exposcunt, vel ipsi per se deferunt, nisi per Præpositum, aut ministrum liceat. 8. Si quid cuiquam desit, quod apponi omnibus solet, vel ipse per se, vel potius exigit conuiua vicinior. 9. Perpetui in mensa silentium omnes faciunt: excipitur, qui loco suo rem dubiam ponit, aut explicat, quiq; nostrorum precibus commendata denuntiat: Præpositus demum, vel minister, cum quid occurrerit, quod differri non debeat. 10. Nemo literas in mensa legit, nec Ianitor eas deferit, aut aliud quippiam denuntiat, nisi urgente necessitate, & consulto Præposito. 11. Surgentes expletis epulis, ita
prope

propè mensam consistunt, ut sedentes extremi,
Præposito excepto, stent medij: Actis Deo gra-
tius egrediuntur è triclinio bini, lotisq; in pro-
ximo vestibulo manibus, sine mora recedunt.
12. A Lectorè primū Sacra Biblia leguntur in
mensa; deinde egregium aliquod p̄y Doctōris
opus, postremò liber alius vulgari, seu Italico
sermone conscriptus, in quo vel probata Sācto-
rum historia, vel salutaria documenta trahen-
tur. 13. Lector paratis in suggesto libris expe-
ctat, donec impertita mensa benedictione con-
siderint, nec ab ultima lectione cessat, nisi iussus
à Præposito, nec is iubet, nisi post dimidiū pran-
dium, vel cenam. 14. Vbi finierit, antequā de-
scēdat, Sacerdotem ad rem dubiam ponendam
eo die destinatum inuitat, nisi quis externorū
inuitatus intersit. 15. Singulis hebdomadis be-
nè meritos de Congregatione nostrorū precibus
cōmendant los de scripto recitat. 16. Correctus
emēdata vocabula repetit. 17. Corrector erra-
ta modeste corrigit. 18. Post lectionem conti-
nuò Sacerdotum aliquis expleti inter nos triē-
nij, ut cuique ordinata successione dies obuene-
rit, dubias quæstiones ponit in mensa duas nō
admodum obscuras, aut exquisitas, ex diuinis
litteris, ex morali disciplina, vel ex præceptis re-
ligiōis conscientia. 19. Si quis quæstionem as-
sequi non valens alijs remiserit, modeste fecisse
creditur. 20. Si quis adsit externorum, nō pro-
ponit, nisi iussus à superiore. 21. Absenti qui
pro-

*proximè post illū in mensa sedere debet ad pro-
ponendum succedit. 22. Explicant alterutram
questionem singuli respondentium: solus qui
proposuit ad utranq; respondet. 23. Respon-
dentium primus, qui proximū proponenti locū
inferiorem tenet, deindè alij Sacerdotes expleti
in Cōgregatione triennij eodem ordine. 24. Est
perbreuis cuiusq; responsio, etiam proponentis,
& sine aliquo apparatu, aut ostentatione.*

Appendix.

*Instituta hæc declarare (modò nihil innouēt)
Prepositus, & Deputati possunt.*

Admonitio.

*In Congregatione nostra progressus ad vir-
tutes, & pia perfectorum emulatio esse debet:
nulla verò per hæc instituta, vel constitutiones
a peccatum obligatio sit sua nobis Deus boni-
tate propitius.*

*Finiunt instituta Congregationis Beati Phi-
lippi, seu Oratorij Romani S. MARIE in
Vallicella, summatim collecta, sanctæq; Sedis
Apostolicæ auctoritate condita, recognita, &
confirmata.*

